



KOMISIJA ZA RAČUNOVODSTVO I REVIZIJU
BOSNE I HERCEGOVINE

ISPIT ZA STJECANJE PROFESIONALNOG ZVANJA
CERTIFICIRANI RAČUNOVODSTVENI TEHNIČAR
(ISPITNI TERMIN: MAJ/SVIBANJ 2025. GODINE)

PREDMET 1:
UVOD U FINANSIJSKO RAČUNOVODSTVO

I – TEST PITANJA

1. Imovinu jednog privrednog društva čini (zaokruži najpotpuniji ispravan odgovor):

- a) stvari i prava
- b) stvari, prava i novac
- c) prava i novac
- d) stvari, prava, novac i pozajmljeni kapital

2. Primjena kontnog okvira u našoj zemlji je:

- a) obavezna
- b) fakultativna
- c) propisana računovodstvenim politikama privrednog društva
- d) nijedan od odgovora nije tačan

3. Usaglašavanje knjigovodstvenog sa stvarnim stanjem sredstava i obaveza, podrazumijeva:

- a) usaglašavanje količina i knjigovodstvenih vrijednosti sa stvarnim vrijednostima bilansnih pozicija
- b) usaglašavanje količina i stvarnim vrijednosti sa knjigovodstvenih vrijednostima bilansnih pozicija
- c) usaglašavanje količina i stvarnim vrijednosti sa stvarnim vrijednostima bilansnih pozicija
- d) sva tri odgovora su tačna

4. Građevinski objekat čija je nabavna vrijednost 100.000 KM je stavljen u funkciju 30.09.2013. godine. Stopa amortizacije je 1%, a procijenjena rezidualna vrijednost 10.000 KM. Koliko iznosi amortizacija u prvoj godini korištenja građevinskog objekta?

- a) 1.000 KM
- b) 900 KM
- c) 225 KM
- d) 250 KM

5. Finansijski rezultat kao razlika prihoda i rashoda perioda može biti utvrđen i prezentiran u skladu sa:

- a) samo metodom ukupnih troškova
- b) metodom ukupnih troškova ili metodom troškova prodatih učinaka
- c) metodom ukupnih troškova, metodom troškova prodatih učinaka i zbirnom metodom
- d) isključivo metodom troškova prodatih učinaka

6. Zaokruži tačnu/e tvrdnju/e:

- a) U dnevnik blagajne evidentiraju se svi priljevi i odljevi gotovog novca, a na osnovu naloga za plaćanje i naplatu i priloga u obliku računa.
- b) U dnevnik blagajne evidentiraju se priljevi gotovog novca, dok se odljevi gotovog novca evidentiraju u pomoćnoj knjizi odljeva.
- c) U dnevnik blagajne evidentiraju se samo oni priljevi i odljevi gotovog novca koji su odobreni od strane revizora.
- d) U dnevnik blagajne evidentiraju se svi priljevi i odljevi gotovog novca koji prelaze dozvoljen iznos plaćanja gotovim novcem.

7. Računi pasivnih vremenskih razgraničenja služe za evidentiranje:

- a) unaprijed naplaćenih prihoda
- b) obračunatih a nenaplaćenih prihoda
- c) unaprijed plaćenih rashoda
- d) nastalih a neplaćenih rashoda

8. Cijenu koštanja zaliha (vlastitih) učinaka čine:

- a) pripadajući direktni troškovi proizvodnje
- b) fakturna vrijednost zaliha, uvećana za zavisne troškove nabavke
- c) pripadajući direktni i indirektni troškovi proizvodnje
- d) pripadajući direktni i indirektni troškovi proizvodnje, uvećani za očekivanu prodajnu maržu

9. Privredno društvo je u svoje ime za tuđi račun prodalo robe u vrijednosti od 5.850 KM sa PDV-om. Nabavna vrijednost prodane robe iznosi 4.000 KM, a stopa PDV-a 17%. Koliko iznosi prihod pravnog lica?

- a) 5.850 KM
- b) 5.000 KM
- c) 4.000 KM
- d) 1.000 KM

10. Kapital privrednog društva obuhvata:

- a) rezerve
- b) izdvojena novčana sredstva
- c) emisiju premiju
- d) postrojenja

11. Preduzeće XY d.o.o. je tokom 20x3. godine prodalo robe u vrijednosti 100.000 KM za koju je ispostavilo račun kupcu. Potraživanja su naplaćena tokom 20x3. godine u iznosu od 90.000 KM, a tokom 20x4. godine u iznosu od 10.000 KM. Preduzeće u 20x3. godini ima obavezu u poslovnim knjigama iskazati:

- a) prihod od prodaje u iznosu 100.000 KM i priljev od naplate u iznosu 100.000 KM
- b) prihod od prodaje u iznosu 10.000 KM i priljev od naplate u iznosu 90.000 KM
- c) prihod od prodaje u iznosu 0 KM i priljev od naplate u iznosu 100.000 KM
- d) prihod od prodaje u iznosu od 100.000 KM i priljev od naplate u iznosu 90.000 KM

12. Međunarodni standard financijskog izvještavanja za male i srednje subjekte (MSFI za MSS), prema Odjeljku 1, ne mogu primijeniti subjekti:

- a) čijim se dužničkim instrumentima ili instrumentima kapitala trguje na javnom tržištu ili je u procesu emisije takvih instrumenata za trgovanje na javnom tržištu
- b) koji drže imovinu u fiducijarnom svojstvu za širu grupu vanjskih strana kao jedan od svojih primarnih poslova
- c) koji nemaju javnu odgovornost i objavljuju finansijske izvještaje opće namjene za eksterne korisnike
- d) koji imaju javnu odgovornost i koji objavljuju finansijske izvještaje opće namjene za eksterne korisnike

13. Knjigovodstvo podrazumijeva:

- a) sistem čije funkcioniranje osigurava informacije o finansijskom položaju, uspješnosti poslovanja, tokovima gotovine, promjenama na kapitalu i drugim finansijskim i nefinansijskim informacijama značajnim za eksterne i interne korisnike finansijskih izvještaja
- b) evidentiranje, klasificiranje i sumiranje poslovnih transakcija i čuvanje originalne poslovne dokumentacije koja pruža dokaze o tim transakcijama
- c) ispitivanje finansijskih izvještaja radi davanja mišljenja o tome da li oni objektivno i istinito, po svim materijalno značajnim pitanjima prikazuju stanje imovine, kapitala i obaveza, rezultate poslovanja, tokove gotovine i promjene na kapitalu
- d) ništa od prethodno navedenog

14. Šta od navedenog podliježe obračunu amortizacije:

- a) građevinski objekti
- b) knjige i umjetnička djela
- c) transportna sredstva
- d) postrojenja i oprema

15. U skladu sa odredbama Odjeljka 17. *Nekretnine, postrojenja i oprema* MSFI-ija za MSS, mala i srednja preduzeća kod naknadnog vrednovanja materijalnih stalnih sredstava ne mogu koristiti:

- a) model troška (nabavne vrijednosti)
- b) model revalorizacije
- c) model sadašnje vrijednosti
- d) model neto utržive vrijednosti

16. Društvo je prodalo stroj, te je po prodaji ispostavilo fakturu kupcu na iznos od 58.500 KM (50.000 KM plus 8.500 KM PDV-a). Na datum prodaje nabavne vrijednost stroja iznosi 200.000 KM, a akumulirana amortizacija 160.000 KM. Društvo će prilikom evidentiranja prodaje i isknjižavanja predmetnog prodanog stroja u finansijskim izvještajima iskazati:

- a) dobitak od prodaje u iznosu od 58.500 KM
- b) dobitak od prodaje u iznosu od 50.000 KM
- c) dobitak od prodaje u iznosu od 10.000 KM
- d) gubitak od prodaje u iznosu od 40.000 KM

17. Preduzeće XY d.o.o. je na osnovu odluke skupštine izvršilo isplatu dobiti iz prethodne godine vlasnicima sa transakcijskog računa preduzeća u iznosu od 20.000 KM. O kojoj se vrsti bilansne promjene u konkretnom slučaju radi:

- a) povećanje aktive i pasive za isti iznos
- b) promjene u strukturi aktive (bez promjena u pasivi)
- c) smanjenje aktive i pasive za isti iznos
- d) promjene u strukturi pasive (bez promjena u aktivu)

18. Društvo je u 20x4. godini platilo zakupninu unaprijed za narednih deset godina, u iznosu od 100.000 KM. U 20x4. godini društvo u financijskim izvještajima treba iskazati:

- a) troškove zakupnine u iznosu od 100.000 KM
- b) aktivna vremenska razgraničenja u iznosu od 90.000 KM
- c) troškove zakupnine u iznosu od 10.000 KM
- d) aktivna vremenska razgraničenja u iznosu od 100.000 KM

19. Investicijske nekretnine ne obuhvataju:

- a) nekretnine namijenjene prodaji u okviru redovnog poslovanja
- b) nekretnine namijenjene iznajmljivanju
- c) nekretnine koje se koriste u proizvodnji ili isporuci dobara ili usluga
- d) nekretnine koje se koriste za administrativne svrhe

20. Prema Odjeljku 11 *Osnovni financijski instrumenti* MSFI-ija za MSS, umanjenje vrijednosti potraživanja od kupaca provodi se primjenom:

- a) modela „nastalih gubitaka“, odnosno ako postoji objektivni dokaz o umanjenju vrijednosti
- b) općeg modela očekivanih kreditnih gubitaka
- c) pojednostavljenog modela očekivanih kreditnih gubitaka
- d) ništa od prethodno navedenog

II – ZADACI

Zadatak broj 1.

„SB“ d.o.o. koje se bavi prometom lijekova i medicinske opreme izvršilo je nabavku opreme u vrijednosti 50.000 KM. U postupku carinjena obračunat je trošak terminala od 100 KM, zatim taksa koja se naplaćuje pri uvozu od 250 KM. Ostali troškovi koji se uključuju u osnovicu iznose 500 KM. Plaćeno je 1% carinskog evidentiranja. Izvršen je obračun PDV-a po stopi od 17% na carinsku osnovicu koja je jednaka ukupnim plaćanjima.

Obračunajte PDV i obaveze za carinsko evidentiranje i izvršite odgovarajuća knjiženja!

(15 bodova)

Zadatak broj 2.

Privredno društvo „Z“ d.o.o., obveznik PDV-a, u 2024. godini iskazalo je sljedeće obaveze prema dobavljačima:

- ❖ dobavljač „A“ u vrijednosti od 2.000 KM
- ❖ dobavljač „B“ u vrijednosti od 4.000 KM
- ❖ dobavljač „C“ u vrijednosti od 3.000 KM
- ❖ dobavljač „D“ u vrijednosti od 4.000 KM
- ❖ dobavljač „E“ u vrijednosti od 2.000 KM

U istom periodu privredno društvo „Z“ d.o.o., izvršilo je plaćanje obaveza kako slijedi:

- ❖ dobavljaču „A“ u vrijednosti od 3.000 KM
- ❖ dobavljaču „B“ u vrijednosti od 3.000 KM
- ❖ dobavljaču „C“ u vrijednosti od 2.000 KM
- ❖ dobavljaču „D“ u vrijednosti od 4.000 KM
- ❖ dobavljaču „E“ u vrijednosti od 1.000 KM
- ❖ dobavljaču „F“ u vrijednosti od 1.000 KM

Vaš zadatak je da:

- a) **Sačinite prometni list računa obaveza prema dobavljačima.** (5 bodova)
- b) **Utvrđite koje vrijednosti bi trebale biti iskazane na bilansnim pozicijama: obaveze prema dobavljačima, dati avansi dobavljačima i iznos ulaznog PDV-a.** (5 bodova)
- c) **Objasnite proceduru tzv. dekomponovanja salda aktivno-pasivnih računa.** (5 bodova)

Zadatak broj 3.

Nakon svih provedenih knjiženja, društvo „X“ na dan 31.12.202x. godine ima iskazana sljedeća stanja imovine, obaveza i kapitala:

Opis	Iznos u KM
Nekretnine, postrojenja i oprema	150.000 KM
Ispravka vrijednosti nekretnina postrojenja i opreme	30.000 KM
Zalihe sirovina i materijala	100.000 KM
Zalihe gotovih proizvoda	150.000 KM
Potraživanja od kupaca	130.000 KM
Ispravka vrijednosti potraživanja od kupaca	30.000 KM
Novac i novčani ekvivalenti	50.000 KM
Upisani osnovni kapital	1.000 KM
Zadržana dobit	100.000 KM
Dobit tekuće godine	30.000 KM
Obaveze po kreditima	270.000 KM
Obaveze prema dobavljačima	100.000 KM
Obaveze prema zaposlenima	19.000 KM

Izvršiti sastavljanje i prezentiranje bilansa stanja društva „X“ na dan 31.12.202x. godine grupisanjem naprijed navedenih stavki u okviru imovine, obaveza i kapitala, te utvrditi ukupni iznosa aktive i pasive bilansa stanja za društvo. (15 bodova)

Zadatak broj 4.

Na dan 31.12.202x. godine nastali su sljedeće gotovinske uplate i isplate iz glavne blagajne preduzeća Alfa d.o.o.:

1. Izvršena je isplata poslovođi Marku Markoviću na ime nabave sitnog elektro materijala, u iznosu od 195,00 KM a za koji je priložen račun dobavljača 123.
2. Izvršena je isplata zaposleniku Ante Antić na ime nabave materijala za održavanje čistoće, u iznosu od 155,00 KM a za koji je priložen račun dobavljača 44.
3. Izvršena je isplata zaposlenici Ani Anić na ime podnesenog naloga za službeno putovanje u Sarajevo (2 radna dana tokom 12/202x), u iznosu od 135,00 KM a za koji je priložen popunjen i potpisan te odobren nalog za službeno putovanje broj 10 (dnevnice $2 \times 25,00 \text{ KM} = 50,00 \text{ KM}$, te naknada na ime upotrebe osobnog vozila za put u Sarajevo u iznosu od 85,00 KM)

Prethodno stanje blagajne iznosi 1.500,00 KM.

Vaš zadatak je da:

- a) Sastavite blagajnički izvještaj za dan 31.12.202x. godine (7 bodova)
- b) Proknjižite blagajnički izvještaj za dan 31.12.202x. godine (8 bodova)